

# MY BIBLE FIRST

PRIMARY YEAR A  
Q 3 #38

## Thupha le Samsiatna

### SUNDAY

“Israelte Pasion in Jericho kulhpi muanhuaite  
1 nawkpaai zo ta hi!”

Hih thutak pen Canaan khuapi tengah kizel pah dingin i um hi. Mi khempeuh lau pah uh hi. Ahi zongin, tua sangin a buaihuai zaw khat om hi. Hih galzawhna pen Pasion zawh kidona ahih lam Israel mite leh Joshua in manggilh uh hi. Pasion hihtheih danin mihingte in hihtheih ding lampi bangmah omlo hi.

Tu in Joshua in Ai khuapi laak ding geel a, thu kansim ding mite a sawl hi. Tua thu kansim mite Joshua kiang a tunkik uh ciangin, Ai khua neu lua ahih manin galkap za nih leh za thum sang a tamzaw a do dingin puak ding kisamlo hi, a ci uh hi. Joshua in zong tua cih pah hi. **Joshua 7:3, 4.**

Ai khuapi sim dingin galkapte pai uh a, kuamah patau lo uh hi. Mi khempeuh in tua kidona a zo dingin ki-um uh hi. Ahi zongin, a sawt loin a ngaihsutna uh kilaih hi. A thupiangte ngaihsut hak sa uh hi. Amaute in bangci ngaihsut uh hiam? **Joshua 7: 5, 6.**

Joshua in a thupi mahmah thu khat mangngilh hi. Amah in a geelna pen Pasion geelna mah hiam cih dot ding manggilh hi. Joshua in na dong hileh, Pasion in vai buaina a kipuahphat masak ding uh gen ding hi.

Pasion in a mite it hi. Ahih hangin, a mite in Amah a muan ding leh a sawl bangin na khempeuh a man gaih ding uh thupi mahmah hi. Tua hileh Pasion in amaute thupha pia thei hi.

Satan in Pasion' geelna ahi a mite lungnop ding leh lungmuan nadingte a susia dingin hahkat mahmah hi. Ahih hangin, Pasion mite in Satan geelna leh Pasion




### KAMNGAH

Na mawhna un nomau mah hong pholak  
ding hi. Gamlak-vakna 32:23

Be sure your sin will find you out. Numbers  
32:23

geelnate a zui khawm thei diam? Joshua leh Israel mite in tu-in bang hih thei diam? Tua thute zingciang sin ding hihang.

 **NGAIHSUN-IN:** *I geelnate Ama kiangah i pulak khiat dingin Jesu in hong deih lai hiam? A tuacih ding hileng, bangbang a piang zongin ei tawh hong omkhawm dingin Jesu i muang thei ding hiam?*

### MONDAY

Galdona ah Ai khua in zo in, Israel tate'n lel uh  
2 hi. Joshua leh makaite in tua thupiang pen um zolo uh hi. Amaute bangzah in dah cih na phawk lai hiam? **Joshua 7:6.**

Joshua in Jordan gun gal khat ah teen'huai mah hiam cih khawng hong ngaihsun hi. **Joshua 7:7.**


Koi bangin Joshua in tuaci ngaihsut ahi tam? Pasion Mahmah in gun gal kantansak-in nalamdangpi tawh amaute huh hi. Tua tham loin, Jericho kulhpi a suksiat ding zong na lakkhin hi. Pasion Mahmah in amau adingin tua kulhpite nawkpai hi.

Joshua leh makai dangte dahna taktak a thu bang hiding hiam? Joshua in a lungsim khempeuh tawh


Pasian it hi. Amah in Pasian vangliatna leh thupitna miteng theisak nuam hi. Ahi zongin Ai galdona ah a lelhna in, tuate susia cih thei hi. Tu-in, Canaan mite in Pasian muan ngam huailo a, vangliatna nei khin taktaklo hi, ci-in ngaihsun ding uh hi. **Aneu 8, 9.**

Pasian in Joshua it mah hi; Joshua leh makai dangte ngaihsutte zong Pasian in thei hi. Ahi zongin tu in buai kik kulta hi. Limtak-a a kisit phat ding uh buaina lianpi khat nei uh hi.

Bang piang hiam? Banghang in Israel tate in Ai khua dona ah lel uh hiam? **Aneu 10-13.**

 **NGAIHSUN-IN:** *I geelna khempeuh Jesu gen a kul hiam? Kul mah hi! Tuate Amah'n thei nuam hi; hun sial-in Ama hubna i kisam hi. Paunak 3:6 sim in. Tua in a lamdang kamciam hilo hiam?*

## TUESDAY

 Achan in a kimteng en hi. Kuama muh loh 3 laitak, manlang takin na khat selsim hi.

Achan in kua hiam? Amah pen Israel galkap, Judah beh sung pan hi. Galkap dangte tawh kulhpi a cipna tawh kuankhawm a, Rahab leh a innkuanpihte lobuang mi gilote a kisuksi-atna Jericho ah amah zong va kuan hi.

Pasian in tuatak-a na khempeuh - innte, kumpi innte, biakinnte, tuate khempeuh sunga na hoihte khempeuh a haltum dingin Israel-te sawl hi. Mei tawh a kihaltum theilo vante pen Pasian tungah a tuam-in citpiakna in kizang ding hi. Mi khatpeuh in ze-etna ah puk-in, na khatpeuh a guk aleh amau tung leh Israel khempeuh tungah samsiatna ngah ding hi. **Joshua 6:18, 19** sim in.


Achan in Pasian gensa manglo hi. Israelites galkapte a ciahkik uh ciangin Achan a puanbuk ah kinawh takin pai hi. “Manlang in! Puanbuk khak in! Leitawhna tuu koilai ah? Kinawh!” Achan in a guksate a innkuan pihte a lah ciangin hih thu kepsim ding hamsa kha ding hi. Kham! Ngun! Leh Babylon pana hong kipua puansilh hoihte himawh hi! Achan' zi leh a tate lungdam mahmah ding uh hi.

Manlang takin lei tokuak in, tua vante tunin seel uh a, a lupna pheel uh tawh sinsuk kha ding hi. Amaute hau uh hi. A thusim uh kuamah'n theilo hi. Theilo takpi hiam? **Late 139:1-4** sim in.



**NGAIHSUN-IN:** *Hih tangthu pan sin ding thu bangzah om hiam? Joshua in bang manggilh hiam? Achan in thukham bangzahna palsat hiam?*

## WEDNESDAY

 Israelte mite in Ai tawh kidona ah lel uh hi. 4 Tu-in, Joshua in a hang theita hi. Ahi zongin a mi pen koici kawkkhiat thei ding uh hiam?

Pasian in a sepzia ding Joshua hilh hi. Amasa in, beh khempeuh i minteng Pasian mai-ah paipih ding hi. Pasian in koi pen cih teelsak ding hi. Tua zom ah, tua beh sung pan innkuan lutangpi minteng paipih ding hi. Pasian in kua hiam cih lak leuleu ding hi. Tua zom ah, innkuan lutangpi nuai ah innkuan minteng paipih ding hi. Pasian in a mimawhte pen koi innkuan pan cih lak ding hi.

Hih danin, Pasian in tua mimawhpa kipulak-in, mawhmaina a nget theih nang hunpha pia ding hi. Ahi zongin kuamah hong pulaak khiat kei aleh, a tawpna ah Pasian in a mawh taktakpa pholak ding hi.

Beh khempeuh a lung-hihmawh ding na ngaih-sun thei hia? A tawpna ah Pasian' kawkkhiat beh khat kipulakta hi. **Joshua 7:16.**

Achan pen tua beh sung pan hi. Tua ciangin, Pasian in innkuan lutangpi khat kawh hi. Judah beh khempeuh in ngai dimdem ding uh hi. **Aneu 17.**

Achan pen tua innkuan lutang sung pan hi. Tu in Pasian in innkuan lutangte

lak panin khat kawkkhia hi. Tua khit ciangin bang piang hiam? **Joshua 7:18, 19.**


Achan kiman khia hi. Amah kisuang loin dah tuak se nailo napi, a sepkhiatsate pulak kul ta a, tua in khi-alhna hi. Achan in a mawhna hangin galkap 36 te'n sihlawh cih thei hi. Tu in amah leh a innkuanpihte zong a sih kul ding hi.

Achan' nu-le-pate in Pasian' Thupiak Sawmte zahtak ding leh zuih ding Achan thuhilh lo uh hi. Achan in zong ama tate hilh tuanlo hi. Dahhuai mahmah hi.

Moses in Pasian thumanlohna tawh kisai Israel tate na hilhkhoh zo hi. Moses gensa bangin hong tangtung pah hilo hiam? **Gamlak-vakna 32:23** sim in.



**NGAIHSUN-IN:** *Na nu le pa in na ut bangbang in hong gamtat sakloh tu-in na nuam hiam? Amau in nang hong it taktak hi. I mawhnate in ei hong nasak-in midangte zong nasak hi.*



© sweetpublishing.com; License—<http://creativecommons.org/licenses/by-sa/3.0/>



## THURSDAY

**5** Mi khempeuh lungnuam ta hi. Achan hangin dah uh himah leh, Pasian in amau thupha piakik thei cih tawh lungdam uh hi. Tu in Pasian in amaute bang hih dingin sawl hiam? **Joshua 8: 1, 2.**

Buksimna in bang hiam? Galte theihloh laitak kiselsim-in, thakhat-a galte va simna hi. Israel galkap pawlkhat in khuapi nungah kiseel ding hi. Adangteng in Joshua tawh khuapi mai ah om ding uh hi.


Ai mite in amau lau dingin na ummawh hiam? Laulo kha ding uh hi. Ai khua mite in a zokik dingin ki-lamen uh hi.

Zan laitak-in, Israel galkap pawlkhat in a kibuk nading mun ah va paisim uh hi. Joshua pen adangteng tawh om hi. Zingsang tungin Ai kumpipa in Israel mite galdo dinga hong pai mu a, amaute a khawlsak dingin amah leh a galkapte dingkhia pah uh hi. Ai kumpipa in amaute a hawlkhia ziau dingin kingaihsun kha ding hi.

**Aneu 14-17.**

Joshua in a galkap kibute kiangah, “Hong en un! Khawl-in ka teipi tawh Ai khualam ah ka kawc ciangin, na bukna panun hong taikhia a khuapi lak ding cih kong lahna hi,” ci hi. Tua hun lian in bang piang hiam? **Aneu 18-21.**

Tu hunin, Topa’ Galkap Bupa amau tawh omkhawm a, amaute in galzo uh hi. Tu in Pasian in Ai mite neih-le-lam pawlkhat na la thei ding uh hi, ci hi. Tua vante bangte cih na phawk lai hiam? **Aneu 2.**

 **NGAIHSUN-IN:** *Tu in na khempeuh lemta hilo hiam? Banghang hiam?*

## FRIDAY

**6** Israel tate in puanbuk sungah a ten zawh uh sawt mahmah ta hi. Tu in, amau inn taktak ah om ding ngaklahta uh hi. Tua hangin Canaan leitang hoih sunga galte hawlkhiat ding lawp mahmah uh hi. Ahi zongin gal a simkik ma in, a thupi mahmah kikhopna khat neih kul hi, ci-in Joshua in gen hi.

Moses in a sih ma in, Joshua kiangah Israel mite tawh a neih a thupi mahmah kikhopna thu nihvei na

gen hi. Moses in Joshua hih ding leh a gen ding thute na gen hi. Mi khempeuh tua kikhopna ah a pai uh ding uh ahi hi. Mi khempeuh himah hiam? Himah hi. Nute, pate, leh naupangte khempeuh kihel hi. Tua kikhopna pen Schechem a cihna mun ah kinei hi.

Mite in Shechem thu theiciat uh hi. Tua mun pen Abraham in a masa penpen biakna tau a lamna mun hi a, tanglai-a a pu a pa uh Jacob ten ngeina mun khat zong ahi hi. Bangzah in lawphuai hiam!

Schechem pen galte kikal ah om hi. Ahih hangin, Joshua in amaute kiangah Pasian thu a man nak vua leh bangmah cilo ding, ci hi. Amaute in thumang uh


a, a khualzinna ah galte kuamah in nawngkaisak lo hi.

Shechem a, mual nihte kikal a et lawm mahmah zaanguam a om hi. Tua mual khat pen Gerizim hi a, Moses in Thupha Mual kici ding hi, a cih pen hi a, mual khat zaw pen in Ebel hi-in, Samsiatna Mual kici ding acih pen ahi hi.

Joshua in thumanna thuphate a sim khit cianging, Gerizim mual tunga om behteng in “Amen” ci uh hi. Thumanlohna samsiatnate a sim khit cianging, Ebal mual tunga om minamte

in zong “Amen” a ci uh hi.

Ebal Mual tungah, Joshua in biakna tau a gol khat lam hi. Hih biakna tau deihna in samsiatnate thuak dinga i kilawm zongin, i kisikkik aleh, Pasian in Satan kiang pan hotkhiat nading Ama geelna hangin lungdam takin mawhmaina hong pia ding hi.

 **NGAIHSUN-IN:** *Hih in a thupi mahmah kikhopna hilo hiam? Mite in Thupiak Sawmte a man aleh Pasian in a lamdang thupha pia ding cih ki phawksakkik hi. Amaute in Satan thu a man vua leh Pasian in thupha pia thei lo ding cih zong thei hi. Moses-i lai atte **Thuhilb-kikna 30: 11-20** sungah sim in.*

**FURTHER STUDY:** Deuteronomy 27; 28; Joshua 7; 8; *Patriarchs and Prophets*, pp. 493–504; *The Bible Story*, vol. 3, pp. 92–95.





## THE STORY CORNER

# Hilda' Ansal Sunga Buaina - Khen 2

by Yvonne Durst

**H**ilda, bang piang ahia?" ci-in ka dong hi. Tua khith teh hih ka dotna pen haihuai cih ka phawk hi. Ansal omna nuai lam tengah tui-uh, tui-ninte kicing hi. Zan sungin ansal sual hong banto a, Hilda in tua a khawlsak sawm hi.

Bawngte in tui dawnna a tuam vilvel bung nei uh a, tua pen hai golpi a tuilawng a kithuahte namdan hi. Bawngte in tui a dawn nop uh ciangin, a nak uh tua bung sungah koihin a tui hong luangsuk pah hi. Zan kimlai-in, bawng khat tui a dawn ciangin a tui pen khawl loin luangsuk kha hi. Zan tawntung luang ahih manin, ansal nuai lamteng tui kivungta hi. Neu napi a khangham khin Hilda in tua tui a khawlsak sawm hi. Huhna a kisap lam zong kimu thei hi.

Hilda in, "Nong huh ding ka maizum mai e. Hih tui uhte siansuah ding haksa mahmah ding hi. Ganhing-ek leh ak-ek tawh kidim hiven," ci hi.

Lungkham kei in, ka ci a, amah ka huh theih ka lungdam zaw hi.



Tua tui ka khak khith ciangin, Hilda huhin bawngte ansal pang langkhat ah hem-khia ding ka kipan hi. Tua ciangin, kahlei tungah kahto in ansal tung khum-a lopakeute lengsawn tungah ka lawnsuk hi. Ansal tung panin an beelkhai dimin ka khiasuk hi. Bawngte leh akte in a zingsang annak ding uh ngah peetpeet ta uh a, nuam mahmah uh hi.

Tua khith ciangin, nasep hamsa penpen sep hunta hi. Ninte luah kul a, tuikicingte phu khia in leh ka phiat uh hi. Tua ka man uhte, bawngte a sianthona langkhat ah ka koih uh hi. Tuatoh alangkhat lam a ninte luakkhia, phu khia in ka phiatkia uh hi. A tawpna ah sual khempeuh hong siangkikta hi. Hih bang nasep!

Inn ah ka paikik uh ciang-in, Hilda tawh uite

sawpin ka siangsak uh hi. Tua khith, ko le ko kisil in puan siangtho tawh ka ki laih uh hi. A nopdan maw!

A lim mahmah ante ka nek lai-un Hilda in "tuni nong hawhin bangdia ansal lam ah hong zong-suak nahiam? Tu laitak kei ka buaina a kipan tunglian hiveng. Kei bek in puah hileng ni thapai sawt ding hi" hong ci hi. Amah kiangah ka pai nop lam ka gen hi. "Ka upmawh in na vatungmi in kei vantungmi huhna na kisap lam gen hi-in teh" cih thu nui kawm in ka gen hi.



Hilda in zong hong nui hi. "Ke'n zong tua dingin um ing," ci-in hong thukim hi. "Khangham pitek ka hih hangin, Pasian in hong it ngei danin hong it veve cih hong phawksak hi. Tu dong ciang hong kemlai hi," ci-in Hilda in hong gen hi.

Hilda aw, maan mah hi. Pasian in hong gen hong sawl thute ka man manin ka lungdam mahmah hi, ka ci hi.

Jesu hong deihsak thute sep ding thupi cih ka phawk hi. Piteek-te huh in, a kihhuai nasep, ganhing ekte siansuah ding ahiehle zong sep veve ding thupi hi. Nang e, na bangci na ngaihsun a? (Manta)



**Additional resources:** nature lessons, activities, music, Bible lessons, Scripture memory, and more.

**My Bible First** Copyright © 2015

**Phone:** 1-877-242-5317

**Web:** [www.mybiblefirst.org](http://www.mybiblefirst.org) • **E-mail:** [sales@mybiblefirst.org](mailto:sales@mybiblefirst.org)

*Unless otherwise noted, Scripture quotations are from the NKJV.*